

In amal hual quinmijcuiluilic Pablo in laneltocanijmes hual cataloaya pa colosas, in Colosenses

Pablo quinmijcuiluilía in laneltocanijmes pa Colosas

¹ Nehual Pablo niunca se ilanahuatini Cristo Jesús pampa yojque nechlajtultic Dios. Nehual huan tocni Timoteo antimijchicahualo.

² Annimitzijcuiluilijtica amhuanten Dios ixolomes hual anquitequipanuilia nepa pa anmocaltilan Colosas, amhuanten hual amo anmocahua pa anquineltotas Cristo. Ma Dios toTajtzin anmitzmaca ilachihualisli cuali huan imosehuilisli pa anmoyolo.

Pablo quilajlanía Dios pa in laneltocanijmes

³ Amo timocahualo pa ticsehuisi Dios pampa amhuanten anunca tocnián. Dios yihual iTajtzin toTata Cristo Jesús. Ticsehuilo quiman yes ticlajlanilo yihual. ⁴ Unca pampa ticmatije quinami niman míac anquineltoca Cristo Jesús. Huan ticsehuilo pampa ticmatije quinami niman míac anquinlasojla moxtin yehuanten hual cate Dios ixolomes hual quitequipanuilo. ⁵ Anquineltoca Cristo Jesús huan anquinlasojla Dios ixolomes pampa amnochixtica pa in tonali quiman anquipías ca yehuanten in hual Dios anmitzpilía pin cielo (ilhuicac) pa anmitzmacas. Anquimatic

inon pa innojen tonalijmes quiman anquicaquic Dios ilajtol melahuac hual unca ilamachiltlisli cuali. ⁶ In lamachiltlisli cuali ajsic capa amhuanten, huan yoje pejtica momachiltía pa mochi in lapticpan. Momiactitlalo in lacames hual pejitate yulilo quinami Dios quinequi. Quema, momiactitlalo in lacames hual quineltocaticate in lamachiltlisli cuali. Unca jan quinami noje panujtica ca amhuanten quiman anquicaquic Dios ilajtol. Umpa anpehuaya anquimati quinami neli Dios quinchihuila cuali lacames. Huan Dios ilachihualisli cuali unca quinami quinpujpuhua inminlaijaculisli. ⁷ Quema, Dios tejchihuila icuali jan quinami anmitznextilic Epafras hual yihual ticnequilo míac. Ca yihual tictequipanuililo Cristo. Ticmatilo quinami cuali tequipanúa Epafras, ticmatilo yihual neli quitequipanuilitía cuali Cristo. ⁸ Noje yihual techmachiltic quinami anlalasojla mochi sejse ca amhuanten, pampa lajtic pa anmoyolo anquipía in Espíritu Santo hual anmitzlasojlaltía.

⁹ Huan pampa inon, pa in tonali hual ticmatije inon ammonahuac amhuanten, yoje tipehualoaya ticlajlanilo Dios huan ticlajlanilo míac mojmosta pa anquimatis mochi hual len quinequi pa anquichías. Ticlajlanilo ca míac lajlanilisli pa anquimatis inon ca in lajmatilisli hual ticpialo tehuanten huan amhuanten pan ipampa toyolo. Huan ticlajlanilo pa anquimatis len quinequi quijtúa mochi pan ipampa in lajmatilisli pa anmoyolo. ¹⁰ Pampín anquimatis anyulis anlanextilijtica pampa anunca lacames hual toTata Cristo huelitijtica pa anmoyolo. Quema,

yojque anyulis anquipaquiltitica toTata ca mochi hual anquichía. Pa anquipaquiltis Dios, anyulis anquichijtca mochi hual unca cuali. Yojque anyajtías anquimaztica len quinequi Dios pa anquichías. ¹¹ Huan pa anquichías inon, Dios amitzhueltis ca mochi ilahueltilisli, pampa yihual quipía mochi lahueltilisli. Yojque ca ilahueltilisli hual yihual Dios amitzmaca, amhuanten huil anmopepenialtía mochi amo cuali, amo anquinectica anmolacuepilis sinda anmijchihuilo len amo cuali. Huan yojque ca Dios ilahueltilisli anquipías paquilisli, mas que anmitzpanus len amo cuali. ¹² Ticlajlanilo Dios pa anyulis mochi tonalijmes anquisejtica toTajtzin hual unca pin cielo. Unca toTajtzin hual tejchíac pa ticayasi lachijchihuali pa ticanasi mochi icuali Dios hual huelitijtca capa tehuanten. In cuali cayas imminyaxca mochi ixolomes Dios. Capa Dios huelitía unca quinami mochi unca lahuilisli, pampa ticmatilo pa toyolo mochi hual unca melahuac. ¹³ Techquixtic toTajtzin pin polehuilisli capa huelitiaya Satanás. Pan ipampa in laijlaculisli, mochi unca laticumac capa quipía Satanás in lahueltilisli. Techijcuanic Dios pa camo ticayasi nepa, huan techlalic capa huelitijtca iXolol hual toTajtzin quila sojla míac. ¹⁴ Yehuanten quimictije Dios iXolol huan quisac iesli. Unca quinami techcuahuac ca iesli. Yoje techijcuaniilia tolajlaculisli, huan yojque techquixtic pin ilahueltilisli Satanás. Axcan tolajlaculisli unca lapujpuhuali.

Unca mosehuilisli pa toyolo pan ipampa

quinami Cristo miquic

¹⁵ Amaqui huil quita Dios huan amaqui huil quiximati. Ma yoje technextilic Cristo jan quinami unca Dios, pampa yihual unca quinami Dios. Huan Dios hual unca Cristo iTajtzin quimacac Cristo pa yes iyaxca Cristo pa huelitis pa mochi hual quichíac. ¹⁶ Pan ipampa Cristo Dios quinchíac mochi hual unca pin cielo (ilhuicac) huan pin lalticpan. Quinchíac len huil tiquitalo huan len amo huil tiquitalo. Quema, quinchíac mochi hual quipialo lahueliltisli huan in ijyecames hual mochihuanijme amo cuajcuali hual huelitilo yoje huan yoje ca míac ojlices hual amo moitalo. Mochi innojen quinchíac yihual Cristo pa cayalosquiaya pa yihual. Cristo quinpías pa yehuanten quichihuilisi len quinequi, huan pa yehuanten lanextilisi quinami yihual unca hué. ¹⁷ Huan Cristo yultataya quiman ayamo yec lachihuali nindeno. Yihual quinchihuilia pa camo mocahuasi pa yesi mochi innojen hual quinchíac. ¹⁸ Cristo huelitia capa yehuanten hual quineltocalo, jan quinami se itzontecon huelitia pa se icuerpo. Huan yihual in niman hué ca mochi hual huelitilo. Unca iyaxca pa huelitis pa mochi, pampa yihual quipehualtic mochi. Yihual unca in niman hué ca yehuanten hual miquije huan cuaquín yulije oc sejpa. Yojque unca yihual in niman hué ca mochi. ¹⁹ Unca pampa Dios iTajtzin quitac cuali pa yihual iXolol Jesucristo yesquiaya quinami yihual huan pa quipiasquiaya mochi lahueliltisli quinami yihual. ²⁰ Quema, Dios quitac cuali pa iXolol Jesucristo quichiasquiaya pa yelosquiaya ca

mosehuilisli ca Dios mochi hual cate pin lapticpan huan pin cielo. Inon quinequi quijtúa pampa quitac cuali Dios pa ixolol quichiasquiaya pa lacames huan mochi hual cate pin lapticpan yajmo yesi Dios ilacocolinijmes. Huan pampa miquic Cristo pin cuahuil huan quisac iesli, yoje quinchihuilic in mosehuilisli.

²¹ Huan nepa pa yina huan axan amhuanten amo anquinequini anquiximati Dios. Anquijtuni pa anmoyolo quinami Dios ilacocolinijmes pampa amo anmocajtiahuiaya pa anquichías len niman amo cuali. ²² Ma yoje, axcan anmijchihuilic Cristo pa anyesquiaya ca mosehuilisli ca yihual. Yoje que anmijchihuilic nepa quiman miquic. Huan axan anunca ca mosehuilisli ca yihual. Yoje yajmo anmitzitas laijlaculi mas que anquichiac amo cuali. Axan huil anquitequipanuilia yihual san. Huan anmitzitas quinami lacames hual amaqui huil anmitzmotexpahuilis ca nindeno huan yoje huil anmitzlalis ilaxpan Dios. ²³ In nicmati pampa anyultia anquineltocatica Cristo. Huan sinda amo anmocahuas pa anquipías mochi anmolaneltocalisli ca yihual, amo anmijcuanis pa iojli Cristo. Nepa anquichixtias in tonali quiman anquipías mochi hual len Dios neli anmitzmacas. Yoje techilia Dios ilamachiltlisli cuali hual anquicaquic. In yec lamachiltli ca moxtin hual cate pin lapticpan. Huan nehual Pablo nilapalehuia ni clamachiltitica inon pampa nechmaca Dios in tequipanulisli.

Dios quilajtultic Pablo pa quintequipanuilia in laneltocanijmes capa yes moitililo

²⁴ Axan nípanujtica lacocotilisli pa amhuanten. Pampa in, nicpixtica paquílisli, pampa nípanujtica len lacocotilisli pan nocuerpo calica niplantía ca in lacocotilisli hual panuc Cristo pa in laneltocanijmes, yehuanten hual quineltocalo Cristo. Yehuanten cate quinami Cristo icuerpo nican pan lalticpan.

²⁵ Nehual níquintequipanuilia yehuanten in laneltocanijmes pampa nechljajtultic Dios pa yojque nitequipanus pa annimitzpalehuis. Quema, Dios nechljajtultic pa annimitzlamachiltis mochi ilajtol. ²⁶ Pan tonalijmes mochi pa yina huan in tonalijmes hual ajsitihuhaloaya pa axan, Dios amo lamacahuitiaya pa quimatirosquiaya lacames in hual quipiaya lalatili. Axan unca tolaixpan tehuanten hual ticate ilacames.

²⁷ Quinnextilijtica inon pampa quinequiaya pa quimatirosquiaya ixolomes quinami unca niman hué huan cuałtichin inon hual quipiaya lalatili. Axan Dios quinextilijtica yehuanten hual amo judíos. Huan inon hual Dios quinnextilijtica unca pampa Cristo yuli lajitic pa amhuanten. Pampa in, anquichixtica pa ajsis in tonali quiman ticpiasi ca yihual mochi in lahueltilisli cuałtichin hual yihual quipía pa tejxiluilis.

²⁸ Mojmosta tilanahuatijticate ca ilajtol Cristo. Tiquinmilijticate moxtin pa lacaquisi pa quimatisi len unca in polehuilisli hual quinpanus yehuanten hual amo quineltocalo. Tiquinnextilijticate mochi sejse pa monextilisi niman cuali Cristo ilajtol, pa yoje tiquinlalisi moxtin ilaixpan Dios pa yihual quinmitas jan cuali san, pampa cate ca se lajtulisli ca Cristo.

²⁹ Huan pa yoje Dios quinmitas jan cuali san yehuanten, nitequipanúa niman chicahuac. Nimotolintica ca mochi ichicahualisli Cristo calica nechtequipanultía ca ilahueliltilisli.

2

¹ Niquijtúa inon pampa nicnequi pa anquimatis quinami mícac nimotolinía niclajlantica Dios pa amhuanten huan yehuanten in laneltocanijmes pin caltilan Laodicea, moxtin hual amo quiman nechitaje pa nechiximatirosquiaya. ² Nimotolinía niclajlantica Dios pampa nicnequi pa quipiasi lanequilisli pa quineltocatiasi. Huan quipiasi in lanequilisli sinda cayasi ca jan se lajtulisli. Yehuanten cayasi jan se sinda molasojlasi pa neli quimatisi mojmosta oc se nadita pa inminyolo len quinequi quijtúa Dios ilajtol. Ma molasojlacan pa yoje quimatisi len quinejquijtu mochi. Yojque quimatisi inon hual Dios amo quimacahuitiaya pa ticmatilosquiaya niman pa yina huan pa mochi xixihuimes hual ajsitihualaloaya pa axan. Axan Dios techmachiltía. Huan techmachiltía pa ticmatisi Cristo ilamachiltisli cuali calica tiquiximatico. ³ Mochi hual monotza pa ticmatisi unca lalatili ca Cristo. Yihual quipía la'ajcoquili capa yihual. ⁴ Inon annimitzilijtica pa amaqui anmitzcuajcuamanas ca lajtomes cuajcualtichin hual anmitzyamanilisi anmoyolo pa anquinelotas se lamaxtilisli hual islacati. ⁵ Mas que amo niunca nehual umpa ca amhuanten, ma yoje pa noyolo unca jan quinami nicataya umpa. Nicpixtictica paquilisli pampa niquita quinami amhuanten anyuli yoje quinami quixtoca Dios. Huan amo

anmocahua pa anquineltotas Cristo ca míac chicahualisli.

⁶ Pampa in, xiyultiacan anquineltocatía Cristo Jesús toTata jan quinami anpehuac anquineltocac pa innojen tonalijmes hual anpehuac anquicaquic ilajtol. ⁷ Xicchihuacan yoje, pampa ammonextilic cuali ilamaxtilisli huan ammonextilijtía mojmosta oc se tipichin. Huan mojmosta anquineltoca chicahuac ilamaxtilisli. Xicchihuacan yojque pampa yojque anmitzmaxtic Epafras. Quema, xicmatican niman cuali Cristo ilamaxtilisli huan xicsehuican míac Dios.

In yulilisli yancuic hual unca pan ipampa Cristo

⁸ Ximoitilican pa camo anmitzlaneltocaltis se ilamaxtilisli hual nesi cuali huan ma yoje amo unca cuali. Se lamaxtilisli quinami inon amo huil anmitzmaca nindeno cuali pa anmoyolo. Sinda lacames quineltocalo, cuaquín mocuajcuamanalo. Se lamaxtilisli quinami inon unca jan in hual quimaxtilo lacames san. Unca in lamaxtilisli hual quijtulo laijtic pa inminyolo. San quipía nadita ilamaxtilisli Dios huan míac oc se lamaxtilisli hual unca jan ilamaxtilisli in lalticpan san huan amo unca ilamaxtilisli Cristo.

⁹ Ximoitilican pa camo anquineltotas se lamaxtilisli hual amo iyaxca Cristo, pampa Cristo quipía mochi hual unca Dios chantitica umpa laijtic icuerpo. ¹⁰ Yoje, antentica ca iyulilisli Cristo. Anquipía mochi hual monequi pa anyulis ca yihual hual hueltitía pa mochi in ijyecames hual quipialo lahueliltisli. ¹¹ Anpehuac anquineltocac Cristo huan yoje anmochíac Dios ixolomes pampa Cristo quilalic se lanextilisli pa anmoyolo, jan quinami

in judíos mochihualo Dios ilacames quiman quitequilo nadita icuilaxli quinami lanextilisli. Ma yoje, in lanextilisli hual anquipía amo anmijchi-huilije lacames ca inminmajmajuan. Cristo anmijchihuilic pa anyes Dios ixolomes pan ipampa in lanextilisli. Yojque anmitzhueliltic pa yajmo anyulis anquichijtica innojen amo cuajcuali hual anmoyolo amo mocahuaya pa quichihualtis amocuerpo. ¹² In tonali hual ancataya lacuayate-quili ca in lanextilisli pa anmoyolo unca quinami ancataya lalalpachuli ca Cristo huan cuaquíin anyulic oc sejpa ca yihual. Mas que Cristo miquic, quiyuliltic Dios ca ichicahualisli. Huan pampa anquimatic inon, yihual anmitzyuliltic yoje ca ichicahualisli. ¹³ Huan yojque amhuanten anmiquic pa anmoyolo pampa anquichíac laijlaculislí huan amo anyec lacames hual quitocaje Dios. Amo anquipiaya Cristo ilanextilisli pa anmoyolo. Ma yoje, Dios anmitzyuliltic yoje yan-cuic ca Cristo, quipujpuhuac mochi in amo cuali hual ticchihuaje. ¹⁴ Yoje, Dios amo techcahua pa timopolusi pampa amo tincneltocaje len qui-jtúa ilajtol. Unca quinami yihual quijcuanic in amo cuali hual cataya lajcuilulí hual techmotex-pahuiliaya tehuanten. In lajcuilulislí quitequi-huiaya pa timiquisi. Ma yoje, cataya Cristo hual miquic, amo tehuanten. Unca quinami cataya lasaluli pin cuahuil in lajcuilulislí hual techmotex-pahuiliaya tehuanten, jan quinami quisaluje Cristo pin cuahuil. Axcan in lajcuilulislí ya-jmo huil techmotexpahuilia. ¹⁵ Yojque quinquixtilic Cristo in ijyecames amo cuajcuali inmin-lahtiltilisli calica huelitiloaya. Yihual lanextilic

inminlaixpan moxtin pampa yehuanten neli amo quipialo lahueltilisli pa techilisi len ticpialo pa ticchihuasi. Inon quichíac pampa quinsulahuac pa in tonali hual miquic pin cuahuil.

Xictemucan quinami anquipías innojen hual cate pin cielo (ilhuicac) pa tehuanten

¹⁶ Yoje, amo xicneltocacan amaqui hual anmitzmotexpahuilía pampa anquicua len yes lacuali huan ancuni len yes pa cunis se. Huan amo xicneltocacan sinda anmitzmotexpahuilía pampa amo anquichía fiesta (ilhuil) pan calía yes tonali, quinami in layúa hual nesi in mesli yancuic, huan in tonali hual mosehuilo in judíos.

¹⁷ Amo monequi pa anquineltocas in lajtomes pampa quiman Dios quinmilic yehuanten pa yina pa camo quicuasi len lacuali, huan pa quichihuasi fiesta (ilhuil) pan se tonali o oc se tonali, san cataya pampa yihual quinmaxtiaya nadita quinami Cristo yahuiaya tejchipahuili tolajjalculisli pin tonalijmes hual yahuiaya caya pan lapticpan. Unca quinami ilasehuán (ilasehuayan) se quinextilia nadita quinami nesi in se. Huan jan yoje Dios ilajtol pa yina quinextilia ca se lanextilisli hual amo huil tiquitaloaya niman cuali. Quinextilia len Cristo yahuiaya tejchihuili quiman hualac. ¹⁸ Amo ximomacahuiltican pa anmitzilis se pampa amo unca anmoyaxca pa anquimolancuacuetzilía Dios pampa anunca tijtipichin, huan yojque, quil, monequi pa anquimolancuacuetzilis Dios pan inminpampa ilanahuatinijmes pin cielo (ilhuicac). Se hual anmitzilis inon anmijchihuilis

pa camo ancanas inon hual Dios quipía pa anmitzmacas. In se quijtúa pampa monextilic innojen ilamaxtilisli pan ipampa len quitemiquic, moita in se quinami se hué. Ma yoje, amo cataya Dios hual quilic in hual anmitzilía in se. Jan anmitzilía in hual yihual ihuán quijtuc laijtic pa iyolo. ¹⁹ Se quinami in lacal o sihual amo quitocatica Cristo. Yihual Cristo tiquijtulo unca quinami itzontecon in cuerpo huan in cuerpo unca quinami moxtin hual quineltocalo. Pampín mochi in cuerpo moscaltis hué pan ipampa ichicahualisli Dios sinda mochías ca se lajtulisli ca Cristo hual unca itzontecon in cuerpo. Se ilajlajco icuerpo salijticate ca ilapantilisli. Huan ilalhuames canalo mochi hual monequi pa quipías pan ipampa itzontecon. Huan pa inminyolo in laneltocanijmes yoje canalo mochi hual Dios quinequi pa quipiasi. Cristo inmintzontecon quinmaca.

²⁰ Axan anquimati Cristo miquic. Amhantan anquineltoca, huan pampa in, unca quinami amiquic amhantan ca yihual. Yoje, amo anquipías pa anquichías nindeno hual lacames quijtulo pampa monequi pa quichías se pa yoje quipaquitlis Dios. Axan amo anyultica quinami yehuanten pin lapticpan quijtulo monequi pa yulis se. Amo xiquinneltocacan in lajtomes hual quichihuano lacames hual quijtulo quinami monequi pa ticmolancuacuetzilisi Dios. ²¹ Nican unca se lanextilishi hual quijtulo: “Sinda se yulisquiaya quinami Dios quinequi pa yulis, cuaquí amo huil quimatoca in, amo huil quilalía in pa inejnepil, amo huil cana in ca imajmajuan.” ²² Mochi in-

nojen Dios quinchíac pa yoje huil ticchihuasi tote-
 quipanulisli huan pa tiquincuasi huan cuaquinon
 lamilo, yajmo monotzalo len. Amo xiquinnel-
 tocacan lajtomes quinami innojen hual amo la-
 palehuilo nindeno pa se quimolancuacuetzilis
 Dios. ²³ Yehuanten hual quinneltocalo lajtomes
 quinami innojen nesilo quinami lacames hual
 quimatiilo niman cuali quinami Dios quinequi pa
 tiyulisi. Quijtulo sinda yoje mochihualtilo pa
 quimolancuacuetzilisi míac, Dios quijtus pampa
 yehuanten niman hué huan oc sequin amo yoje
 hué. Quijtulo pampa yoje huil quimati se quinami
 mochías tipichin ilaixpan Dios. Quijtulo sinda
 se quinneltoca in lajtomes, quicocoltilo icuerpo
 huan yoje quipaquiltía Dios, huan inon amo unca
 neli. No, in lajtomes amo monotzalo nindeno,
 amo quitzacuila toyolo pa camo quichihualtis
 tocuelpo in amo cuali hual mojmosta quinectica
 quichía.

3

¹ Cuaquinon, anquimati Dios anmitzyuliltic
 pa anmoyolo ca yulilisli yancuic jan quinami
 quiyuliltic Cristo. Pampa in, xictemucan
 pa anquimatis in hual Dios quinequi pa
 anquimatis, hual unca quinami huelitia. Dios
 axan quipía Cristo quinami molalijtica pa ima
 cuali. Yoje lanextilijtica pampa moxtin quipialo
 pa quimolancuacuetzilisi Cristo jan quinami
 quimolancuacuetzililo Dios. ² Xiquijnamictiacan
 inahuac len unca pin cielo (ilhuicac), amo
 xiquijnamictiacan inahuac len unca pin
 lalticpan. ³ Niquijtúa inon pampa anmocahuac

pa anyulisquiaya quinami anyulini pa innojen tonalijmes hual ayamo anquineltocaya Cristo. Axan lamic in yulilisli. Ma yoje anquipía yulilisli axan hual inahuac inon ayamo anquimati mochi. Unca jan quinami tehuanten ayamo ticmatilo mochi hual inahuac Cristo, mas que amhuanten anyultica ca Cristo capa unca Dios. Axcan, amo lamis anmoyulilisli, unca quinami len hual unca lalatili. ⁴ Ma yoje, pan tonali hual nesis Cristo hual techyuliltic ca iyulilisli, cuaquinon noje ca yihual annesis capa Dios huelitia ca ilaixpelalisli cuałtichin. Cuaquín anyes quinami Cristo.

Toyulilisli hual tiyulinijme pa yina huan toyulilisli yancuic

⁵ Yoje, quinami anquitemujtica pa anquimatis quinami huelitia Dios, xicayacan quinami se mijquil hual yajmo quichía len amo cuali. Ximocahuacan pa anquichías len quichijtialo yehuanten pin lalticpan hual amo quineltocalo Dios. Amo xiquinmanacan oc sequin sihuames o lacames. Amo xicchihuacan len hual lanextilía pampa anlajtutica amo cuali pa anmoyolo, amo xilajnamiquican yoje. Amo ximomacahuiltican pa len anmitznequiltis pa anquipías len amo unca cuali. Huan amo xiyén (xiyecan) lacames o sihuames hual quinectialo pa quipiasi míac huan míac. Yehuanten hual quichihualo inon cate quinami yehuanten hual quimolancuacuetzilohual len quinequilo, quinami yesquiaya se dios. ⁶ Amo xicchihuacan yoje, pampa Dios neli quintojtocas ilaixpan pa yesi lacocoltili yehuanten hual yulilo amo quineltocaticate. Quincocoltis

pampa quinchihualo innojen. ⁷ Amhuanten nojen anyulini anquichijtata ya innojen pa yina pan tonalijmes hual anyulini quinami yulilo yehuanten hual amo quineltocalo toTata. ⁸ Huan axcan, amhuanten ximocahuacan noje pa camo anquichías mochi innojen, niquijtúa, yajmo xicualanican, yajmo xicualantiquisacan, yajmo xicnequican xiquinchihuilican oc sequin len amo cuali, yajmo xilahuejuecaltican, yajmo xilajtucan ca lajtomes amo cuajcuali, yajmo xilacocolican ca lajtomes quinami innojen. Ma camo quispa pa anmocamac nindeno quinami inon. ⁹ Amo xislacatican se ca oc se. No, yajmo xicchihuacan innojen, pampa anmoquixtilic in yulilisli hual pa yina catani laijtic anmoyolo hual anmijchihualtitiahuini innojen hual amo cuajcuali. ¹⁰ Huan anmolaquitzquic ca in yulilisli yancuic hual anquipía pa anmoyolo, in yulilisli hual anmijchíac lacames yajyancuic. Dios quichíac in lacal yancuic huan quichijtía pa anajsis anyes quinami yihual pan ipampa in yulilisli yancuic calica neli anquimaztías yihual. ¹¹ Sinda quipía se lacal in yulilishi yancuic, cuaqueñon Dios amo moijnamiquía nindeno inahuac quinami cataya, ma ye se hual lacatic pa calía yes lali, ma ye quinami nesi icuilaxli, ma ye da quipía latequili icuilaxli quinami in judíos, o da amo quipía latequili quinami yehuanten hual amo judíos. Dios amo moijnamiquía quinami cataloaya, ma ye quinami quinmitalo oc sequin lacames, sinda quinmitalo huejué o tijtipichin, ma yén (yecan) yehuanten hual amo quimatiло o yehuanten hual quimatiло, ma yén hual yulilo quinami in yulijquimes cua-

jleros o yulilo pan calimes cuajcualtichin, ma yén tequipanujquimes o inmintecojuan. No, Dios jan moijnamiquía sinda Cristo yultica lajtic pa iyolo se. Dios moijnamiquía jan inahuac Cristo san, unca yihual san hual monotza mochi.

¹² Anmoquixtilic anmoyulilisli hual anmijchihuaultiaya amo cuali. Axcan anunca amhuan-ten hual Dios anmitzlajtultic pa anyes ixolomes. Anmitzlajtultic pa anquitequipanuilis yihual san, huan yihual anmitznequi. Yoje, xiquinmicnili-can oc sequin, xiquinchihuilican cuali oc sequin. Xiyecan quinami lacames tijtipichin. Amo xilachihualtican pa oc sequin quichijtiasi quinami amhuanten anquinequi. Amo ximolacuepilican, ximopepenialtican in amo cuali quiman oc sequin anmijchihuilo amo cuali. ¹³ Ximotzacuulican pa camo anquincocolis oc sequin pampa quichihualo laijlaculisli. Huan xicpujpuhuacan quiman yes se ca amhuanten quita len ca oc se ca amhuanten hual quicualantía. Jan quinami Cristo lapujpuhua, jan yojque xicchihuacan amhuanten noje. ¹⁴ Huan mas que anquichía mochi inon, monequi pa anquijnamiquis ca mochi anmochicahualisli pampa anquipía pa anmochías lacames hual quimatilo lalasojlalo. Ximolasojlaca-
n, pampa yojque anmoxtin anyulis jan ca mosehuilisli ca in oc sequin. Inon lanextilis pampa amhuanten anquimati anyuli jan cuali san. ¹⁵ Xiyulican ca mosehuilisli huelitijtica pa anmoyolo. In mosehuilisli anmitzmaca Dios hual anmitznotzac pa jan yoje anyulisquiaya quinami se cuerpo, mas que anunca míac. Huan xiyén (xiyecan) lacames hual quimatilo yulilo quisejti-

cate Dios.

16 Ma cajxilti pa mochi anmoyolo Cristo ilamaxtilisli. In anmitzmaca niman míac lajmatilisli pa anquimatis len unca neli huan melahuac. Ma quinmaxtican mochi sejse ca míac lajmatilisli. Ximonequiltican pa anmomaxtis ca míac lajmatilisli. Inon huil anquichía pan ipampa salmos hual cate alabanzas laquixtili pa Dios ilajtol pa tiquinalilisi latzotzonaisli. Noje huil anquichía pan impampa alabanzas huan cantaditas (cuicames) hual anmitzmaca in Espíritu Santo calica anquinmilis lajtomes huejué pa Dios. Xijcantaruilican (xijcuiquilican) Dios anquisejtica pa anmoyolo. **17** Huan len yes anquijtúa, len yes anquichía, xicchihuacan mochi anquijnamictica pampa yi-hual huelitijtica pa amhuanten. Pampa inon anquinotzas ca itoca pa yihual cayas ca amhuanten pa anmitzpalehuis. Xicchihuacan yoje anquisejtica Dios toTajzin. Unca anmoyaxca pa anquichías inon pan ipampa Cristo.

Monequi pa in laneltocanijmes yulisi quinchijticate innojen pa inmincaltilan huan pa inminchan

18 Amhuanten sihuames xilamacahuiltican pa anmitzlaicanasi anmolahuicalhuan. Unca cuali pa yoque anquichías, pampa anunca iyaxca in Tata Jesucristo. **19** Huan amhuanten inminlahuicalhuan yehuanten, xiquinlasojlacan anmosihuahuan, huan amo xiyén (xiyecan) cualancudos ca yehuanten. **20** Amhuanten in xolomes xiquinneltocacan anmotajtzitzíán huan ammonantzitzíán. Yoje anquipaquiltía míac in Tata Dios huan yoque anlanextilia

quinami anunca Dios ixolomes. ²¹ Amhuanten immintajtzitzán huan inminantzitzán, amo xiquinmajmajuatiacan anmoxolomes, pa camo cuajnesi momajtisi o pinahuasi pa quichihuasi len quinchihuilis cuali. ²² Amhuanten tequipanujquimes anquinpía anmotecojuan nican pin lalticpan. Xiccchihuacan mochi hual anmitzilisi pa anquichías. Amo xiccchihuacan jan capa anmitzita anquitequipanujtica, quinami jan anquinpaquiltiaya lacames san. Xiquinneltocatiacan ca mochi anmoyolo, pa yojque anlanextilia quinami anquipilía lasojlalisli ca toTata. ²³ Huan len yes anquichía, xiccchihuacan ca mochi anmoyolo quinami anquitequipanuilitica in Tata, huan amo jan lacames san. ²⁴ Yojque xiccchihuacan amhuanten, pampa anquimati anyahui ancana mochi hual quipía in Tata pa anmitzmacas. In monequi pa anquichías pampa anquitequipanuilia toTata Cristo. ²⁵ Yojque xiccchihuacan pampa aqui hual quichihuilia len amo cuali, yihual panus lacocoltilisli pampa quichihuilic inon, pampa Dios quita se jan quinami quita oc se, ma ye aqui yes.

4

¹ Amhuanten tecojuan, xiquinchihuican cuali anmotequipanujquimes. Quinami anquichihuilia se, yoje xicchihuican in oc se. Yoje xicchihuican, pampa noje anquimati anquipía anmoteco pin cielo.

² Amo ximocahuacan pa anquilajlanis Dios. Xiclaqlantiacan quiman yes tiquijnamiquía.

Huan quiman anquilajlanía, amo xilatzehuican. Xiquijtutiacan pa anmoyolo in hual anquilitica, huan amo ximocahuacan pa anquisehuis Dios. ³ Huan quiman yes anquilajlantica, xicladlanican pa tehuanten noje, pa yoque Dios techajxiltis capa huil tiquinlaquetzilisi ilamaxtilisli Cristo. Pa yina Dios ilacames amo quimatinijme cuali len quinequiaya quijtu Dios ilajtol quiman momaxtinijme len quijtuc inahuac Cristo. Axan ticmatilo tehuanten. Huan axan niunca latzacuali pa calijtic pampa niquinlaquetzilijtinemiaya ilamachiltisli Cristo. ⁴ Ma yoje, nicnequi pa Dios nechpalehuis pa niquinlaquetzilis pa yoje niquinmilis moxtin ilamaxtilisli Cristo ca lajtol calica amo moixpolulo yehuanten hual quicaquilo, quinami monequi pa nicchías. Pampa in, xicladlanican Dios pa nechpalehuis.

⁵ Ma anmitznextili anmolajmatilisli quinami anyulis cuali quiman anunca capa yehuanten hual amo quineltocalo Cristo. Xiquintequipanucan cuali mochi tonalijmes hual Dios anmitzmacas pa anyulis. ⁶ Xilajtutiacan yoje pa anquinmixtocaltis lacames Dios ilajtol. Yoje anyes quinami in istal hual quixtocaltilia se lacuali. Sinda anlajtúa yoje, cuaqueñon anquimatis jan quinami monequi pa anquinnanquilis moxtin.

Quinchicahua pampa yahui quilamía iamal

⁷ Anmitzilis Tíquico mochi hual nechpanujtica huan quinami niunca. Yihual se tocni hual ticla-sjalo míac, huan ticmatilo quinami yihual huil lapalehuía. Huan yihual tictequipanuilo in Tata

Jesús. ⁸ Annimitztilanilijtca pa yoje yihual quimatis quinami anunca huan len anmitzpanujtca, jan quinami yihual anmitzmachiltis quinami nehual nipanujtca huan yoje ca in anmitzlacahualtis. ⁹ Yasi huan Onésimo hual unca se tocni hual ticlasojlalo, huan ticmatilo yihual amo mocahua pa quitequipanuilis toTata. Yihual se tocni hual lacatic pa anmocaltilan Colosas. Yehuanten Tíquico huan Onésimo anmitzlamachiltisi mochi hual panujtca nican.

¹⁰ Aristarco anmitzpialtía, ca yihual ticate latzacuali pa calijtic nican. Anmitzpialtía noje Marcos hual unca icni Bernabé, icni pa oc se cali. Anmitztilanilije lajtol pa anquimatis quinami anquichihuolis Marcos, sinda umpa huala, xicmosehuiltican. ¹¹ Noje anmitzpialtía Jesús hual noje itoca Justo. In yeyenten cate judíos, quipialo ilanextilisli in latequilisli pa inmincuilaxli. Jan yehuanten san cate in judíos hual ca nehual huan nolajlasoji tequipanujquimes titequipanulo pa ilahueliltlisli Dios. Yehuanten nechlacahualtilo míac. ¹² Anmitzpialtía Epafras, yihual lacatic pa anmolali huan quitequipanuilia Jesucristo. Yihual quilajlantía Dios míac ca mochi iyolo, pa yoje amo quiman anmocahuas pa anyulis anquineltocatica Cristo, quinami lacames hual moscaltije ca lajmatilisli. Yoje quimatiло cuali mochi in hual quinequi Dios pa quichihuasi. ¹³ Inon niquijtúa inahuac Epafras pampa annimitzilía neli yihual tequipanúa niman míac pa amhuanten huan pa yehuanten hual quineltocalo Cristo pin caltilan Laodicea huan pin caltilan Hierapolis. ¹⁴ Anmitzpialtía Lucas, yihual in lapajtini hual

ticlasojlalo, noje anmitzpialtía Demas.

¹⁵ Xiquinpialtican tocñán hual quineltocalo Cristo hual cate pa Laodicea. Xiquinpialtican Nimfas huan yehuanten hual quineltocalo hual monechiculo pa ichan pa quimolancuacuetzilisi Dios. ¹⁶ Huan quiman anlamic anquinmomaxtilic in amal anmoyampa anmoxtin, cuaquinon xiclajtultican se pa yihual quinmomaxtilis in amal inminyampa yehuanten pa Laodicea hual quineltocalo toTata. Huan amhuanten jan yoje ximo-maxtilican in amal hual niquintilanilic yehuanten pa Laodicea. ¹⁷ Huan xiquilican Arquipo pa moiztías pa lamis quichías mochi in tequipanulisli hual quimacac in Tata pa quichías.

¹⁸ Nehual niPablo annimitzpialtitica annimitzijcuiuilitjica nican ca nehual nomajma. Yoje anquimatis pampa mochi in amal unca hual annimitztilanilitjica. Xiquijnamiquican quinami nehual niunca latzacuali pin calijtic. Ma caya ca amhuanten in cuali hual san Dios huil anmijchihuilía. Yoje ma ye.

**Ilajtulisli Yancuic toTata Jesucristo
New Testament in Nahuatl, Michoacán
(MX:ncl:Nahuatl, Michoacán)**

copyright © 1998 Wycliffe Bible Translators, Inc.

Language: Nahuatl, Michoacán

Translation by: Wycliffe Bible Translators, Inc.

Náhuatl, Michoacán [ncl], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Michoacán

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022
da3cba3e-3a5e-5fce-927d-24a57a332bf9